

## Onbeskòp

---

**Bo ta yega na bali den botika. Bo ta entregá un resèpt. E yùfrou tras di bali ta para ta app. Despues di sinku sekònde e ta tuma bo resèpt ku un man, sin hisa kara wak. Mientrastantu su telefòn ta rin. Ku bos haltu e ta papia awor ku su mama òf talbes ku un amiga hostiná. Ku su otro man, e ta tek bo nòmber den kòmputer. Durante e kòmbersashon ku su mama, e ta prent bo bòn di pedida. E ta skùif e den bo direkshon. Bo ta kue e bòn i kana bai kaha. E kòmbersashon na telefòn ta sigui trankil asina. E siguiente kliente ta skùif su resèpt p'e i papiando e ta piki esaki. Ta multitasking esaki òf ta ko'i ònbeskòp?**

Bo ta sintá den un reunion di direktiva di bo fundashon stimá. Un diskushon ta tumando lugá entre dos miembro di direktiva tokante e fecha ku e kuenta anual mester ta kla. Na man robes i man drechi di bo, dos otro miembro di direktiva ta sinta manda mail riba nan selular. E presidente ta terminá e diskushon. E ta puntra si tur hende ta di akuerdo ku e último punto di bista. E dos shonnan ku ta manda mail ta djis hisa nan kara un ratu for di nan telefòn. Nan ta sakudí kabes den afirmashon. Djei nan ta sigui manda mail trankil asina di nan, nan selular riba rudia bou di mesa di reunion. Ta multitasking esaki òf ta ko'i ònbeskòp?

Un konosí a kontami ku resientemente e i su kasá a risibí un skual serka nan yu hòmber di 25 aña na momentu ku tur dos e mayornan (sesentitiki) tabata wak Facebook durante komementu. M'a haña esaki remarkabel. Mi tabatin e idea (aparentemente robes) ku yùist tur hóben kontinuamente ta ku kabes den tur sorto di pantaya ku tin disponibel pa nan komuniká i ku nan lo no tin niun problema ku esaki ètòl. Ta solamente riba edat di sinkuenta aña bo ta logra mantené mas regla di desensia humano. Pues esaki no ta un lei skibí ku lèter di oro. Tin hóben tambe ta haña iritante ora esnan den nan kompania ta blo dualu den un mundu paralelo. Di otro banda, mi ta ripará serka mi mes ku tin un skùifmentu den manera di pensa den direkshon kontrali.

Un sinku aña pasá asina mi por a konsumí enormemente riba tur e appmentu i mandamentu di mail ku tabata tuma lugá durante un reunion. Honestamente bisá, mi mes tambe ta hasié ratu ratu, lur riba un pantaya den un reunion. Ke men, e límitenan ta birando vago. Tòg, ta tiki hende lo aseptá, sin importá edat, si nan mester ta papiando kara kara ku un hende i esaki kuminsá konsultá Facebook tokante algu kompletamente otro durante kòmbersashon. E komunikashon no-verbal ta: loke abo ta bisa òf ke men ei no ta interesá mi niun pátaka. Unda e límite ta e ora ei? I e límite ei ta skùif enbèrdat? E efekto ta mas fuerte den grupo? Kon bo mester dil ku esaki den bo direktiva òf Hunta di Komisario?

E úniko solushon ta di papia riba e tópiko. Pon'é riba agènda. Inventarisá kon tur hende den direktiva òf e hunta ta mira e asunto. Si niun hende no tin difikultat kuné, tremendo! Don't fix it when it is not broken. Pero, maske ta dos pipita di hende mes ta haña e asunto iritante, e ora ei bo mester hasi palabrashonnan serio ariba.

Al fin i al kabo, tur hende den e reunion t'ei pa otro i no pa algu otro. Na otro banda, hiperkomunikashon den nos komunidat ta un echo.

---

Rekonsiliashon di tur deseo ta posibel, dor di hasi e palabrashon, por ehèmpel, ku ta hinka un pouza kòrtiku di tres òf sinku minüt pa manda app òf mail. Ta e presidente mester pèkurá di forma severo pa niun hende no 'peka' entretantu. I ki ta sosodé si un hende ta hasi esaki persistentemente tòg? Bo ta benta e hòmber òf muhé ei for di direktiva òf e Hunta di Komisario, pasó e no ta sufisientemente interesá i/òf tin otro prioridat. Mashá bunita tende, pero no den bo reunion. Ta ko'i ònbeskòp esei!



[Frank Kunneman](#)

VanEps Kunneman VanDoorne  
Attorney at law | Partner

T +5999 461 3400 ext. 254

E [kunneman@vandoorne.com](mailto:kunneman@vandoorne.com)

---